

Jak e lel ek'awɲ

Ów ek'it eke wel k'uw any

Bwo el Jak ee? L'el ey Ɛs Kɔtɔkɔ Jesu lisijim (Matie 13.55, Mark 6.3, Galat 1.19, 1 Korɛnt 15.7). L'el Jerusalem e Nyamel a ec'idr esel ab em e nyam (Ob Kok 15.13-21, Galat 2.9). Jak nɔn lel na awɲ Israel ec'eb lew yony a, gbɛkɔ ow elm Amani Sig em ec'eb lew yony a. Aɲa ow el Jwifel a ek'itɲɲ erm em el Jesu eci, ke gbre ijr a sosiem anɲ Palestín ok ɔkm ɔmu es im ir susu ejec'a oglog, Krist eci jam us esel feɲ ek'el Nyamel ek'usr Israel ek'el Nyam ec'agɲ a usu a. Jak ec'a, agɲ amua anake el Nyam ec'agɲ tasi a. In e lel ab em, n'am dad wel eke wel k'usur erm gbre ij em, wel el esewru, wel is es ke wel kok low ese el el eke ɔmn b'erur ab af. N'am ewar egbrengbi eke k'ocm el ec'os a ewrm sos ow af etɲ n'am atr ɔgbɔru sos es.

Nuɲ krɛkrɛ ab em, Jak am elu in e lel ab em ec'ów a eke li b'ow li dad a e low ɔkm. Nuɲ yony em a, n'am dad agɲ lisijimel a eke k'ew sos erm, yec'etɲ ke -li k'usrm egbrengbi sos -l'akamn ɔgbɔru. Kɔ tasi em ow it eke -li k'elum ɔgbɔru abu anke -l'el agɲ eke egbrengbi a b'eb el ec'abu em ec'ob feɲ. Nuɲ 3.1 toɲ nuɲ 4.12 em a, Jak am dad agɲ a eke b'ocr el sosi esewru, ke am erur eke ki yeɲm agɲ ejec'a Nyam odad a, aru sos ew lele ów es atar ab egb es, ke ew erm sodad eke -li b'ow -li dad ab af. Nuɲ 4.13 toɲ nuɲ 5.6 em a, n'am ewar egbrengbi eke k'ew erm sos ew lele enyembri yony yony owi ab e lís.

L'el a ec'uwr em a, n'am ɔkn wel eke wel k'inym es kikri gbre ijr em, ke wel ɲɲɲ Nyam agɲ a ek'anɲ sos es ɔw em a lele ɔlu ab eci.

Ɛsɲɲ

1 ¹Em Jak, Nyam lele Ɛs Kɔtɔkɔ Jesu Krist ab e juma kok es, m'am esɲɲ ɔny feɲ ek'eel eb lew yony a[†] eke ɔmu es wus na nimum af a.

Gbre em ec'ɔmn ɔny lele sɛwr ab

²Krist em ec'agɲ lisijimel, eke b'ɔbar gbre, es abur akpasu akpasu a, ke sos em ɲɲɲ ɔny, ɲɲɲ ehe em, ³anke ese el el eke ɔny yeɲi uwr any ab af,

[†] 1.1 *Eb lew yony*: Jak am nɔn lel awɲ Jwifel feɲ ek'el Krist e jam us esel krɛkrɛ ek'anɲ Palestín ok ɔkm ɔmu es im anɲ susu ejec'a, oglog Krist eci jam us esel feɲ ek'el Nyamel ek'usr Israel, ek'el Nyam ec'agɲ a usu.

eke ɔny eci Nyam ec'ɔmn a eke ɔny a b'akm ebm ekn es a, ow b'ɔny ɔny erm susu ínymn es kikri. ⁴Ínymn es kikri kpekɛɣ low low fɛɣ em, yec'ɛɣ ke ɔny e low kok fɛɣ em íyr neny igɣn nuɣ, ke k'ónymn low kaka fɛɣ ec'es abur. ⁵Kɔ eke ɔny em ec'ɛɣɣ nyam ɔnym sɛwr eke k'uw el el eke li ki kokr ke n'ínym es kikri ebm ekn owi em a, l'íbrm Nyam, ke ow yégm'n, aɣke Nyam el erm mamnu ek'óom ɛɣɣ ob kaka ɣkpes em. ⁶Gbeko ow akpl ke l'íbrm ɔmn em, ke bebar k'ánm em. ɛɣɣ eke bi bebar a, anɣ ɛsɛ okij e mra eke lɛf b'ɔny didm es ab af. ⁷⁻⁸ɛɣɣ ikɣ na kí tutr eke ɛs Kɔtɔkɔ b'ow ɔɣ'n yec'a eke n'am ibrm a, aɣke l'el ɛɣɣ eke ucum low nyam ɔnym es ke bi cɛcm any in ec'es an em.

Gbɔr lele ob ɔny ab

⁹Ke Krist eci jam us ɛs ek'ɔnym ob a ntotɣ ók eke Nyam ɔny igbl'l ogɣ a sosiem.† ¹⁰Ke Krist eci jam us ɛs ek'ɔny ob a, yeji sos em íɣn eke Nyam ɔny is'r es a sosiem.† Ow it eke li k'uw any eke in ec'ob ɔny a elm low kaka wus af aɣa, ɛɣɣ in obi b'ow ɛc ɛs'e lele eke suw mamn b'uw es kɣab ɛy wus ab af. ¹¹ɛsɛ lele eke ligbn b'afɣ ɔny suw, ke bi wɛwr in e dɔdɔ ab es, ke suw eci sakpl a b'irm a, eben nenyembri nyam gbɛɣɣbi yeji b'ow uw digɣ in e sijuma ok es.

ɛbm ekn lele meju ab

¹²Ehe é l ɛɣɣ eke b'ínym es kikri ebm ekn owi em a eci. Eke n'ínym es kikri a sosiem Nyam b'ow ɔɣ'n sel a† eke l'ɛwar aɣɣ ek'erur ir a. ¹³Eke meju ow ɛɣɣ em a, ke li kí dad li k'ɛsɛ: «Nyam anake ɛju'm a», aɣke Nyam meju owi anm in em. Ow sosiem l'éjum ɛɣɣ kaka. ¹⁴Sica eke ɛɣɣ ɛy meju owi em, ke in obi in obi ec'ów tutr ɛɣɣ anake ɔɣ'n l'ɔɣɣ meb a. ¹⁵ɛɣɣ ɛmeny ów tutr ɛɣɣ eke b'anɣ ɛɣɣ em ow a, b'is ɛɣɣ sikpl. ɛɣɣ ca eke sikpl a b'agb afɣn es a, ow b'ism ɛɣɣ luw ab. ¹⁶Erur em ec'agɣ lisijimel, k'ɛjurir ɔny sosi: ¹⁷sob ap amamn fɛɣ b'anɣ Nyam ogɣ ow; Nyam ek'el usuayl eci kok es a ogɣ ow b'anɣ ow; in em low itɣn kaka anm; n'am titɣnm ɛsɛ usuayl lele ncebn ab af. ¹⁸In obi l'erur, ɛɣɣ n'ɔny ɛy sel in ec'odad ebl nawre ab em, yec'ɛɣɣ ke s'é l mob mob fɛɣ eke li kok anɣ owr a e kɛkɛrɛ.

Èɣɣ Nyam ec'odad eb ke án es af

¹⁹Erur em ec'agɣ lisijimel, sica ɛɣɣ nyam nyam fɛɣ íɣɣ lɔru es iri low ok es sos em, n'ɔfr odad ke k'éblm erm fafa, ²⁰aɣke erm bebl

† 1.9 *Nyam ɔny igbl'l ogɣ*: Krist eci jam us ɛs eke bi kok Nyam juma tasi a, it ek'uw any eke, eke l'el gbɔru wus af aɣa yeji, ke Nyam anake sɔsum oc'r a; afr ow b'ow ɔɣ'n ob ɔny ek'el in ec'ehe. Èkan 4.10; Efes 2.6-7. † 1.10 *Nyam ɔny is'r es*: ow it eke gbɛɣɣbi k'uw any eke, wus af aɣa in ec'ob ɔny a b'ow ɛc. Eke l'uw na any a, ke afr li b'ow n'ɛɣn ehe, ek'el in ec'ob ɔny tasi. † 1.12 *Grek em a sel a ke sel ɛɣn e tufe*: ow el any eb e meny ɛwr, ek'el ebm ekn eke wɛl b'akm es ec'ob ap eke wɛl b'ɛɣn.

b'ɔŋ eɣŋ am kokm low ek'el nenyembri nyam Nyam ec'any af. ²¹Na sostiɛm, iŋŋn low ŋuŋ fɛŋ eke bi ŋuŋŋ ɔny ec'es an a elul es, ke ébr erm es ɛy ɛm, Nyam ec'odad eke wel dad ɔny ek'ɔtu eke k'eb ɔny ec'abŋ elu es a.

²²K'ɛjurir ɔny sosi ki dadr k'esre: «S'írir Nyam ec'odad a cɛ»; kɔ kòkr esɛ lelel eke irir ab af. ²³Kɔ eɣŋ ek'am iri odad a ke ɔsum a, anŋ esɛ eɣŋ ek'am ekan in sosi akroŋŋɔ ɛm lelel eke n'anŋn, ²⁴ke ca li b'ɔny any l'oc es ke kpekŋ li b'ijl lelel eke n'anŋn ab es a. ²⁵Kɔ eɣŋ eke b'ɛw ol sɔbɔ a eke b'ɔny eɣŋ el lewi a[†] erm, ke b'ucu ɔny es, ke ám dadm esme: «m'íri cɛ», ke b'ɛw erm af kok a, b'ow eŋn Nyam ec'ɔwrɔ in ec'ow kok ɛm.

²⁶Eke eɣŋ bi tutr eke l'el Nyam nuŋ iŋŋ es, etŋ l'éwm erm in ec'odad dad ɛm a, n'am ejur in sosi, etŋ in e Nyam nuŋ iŋŋ a el ɔfr ɔfr. ²⁷Kin yeci ek'el Nyam nuŋ iŋŋ nawre tasi Nyam ɛy ɛs ec'any af a: ke éw uwiyŋel lele eŋnyɔw ek'anŋ gbɛ ɛm a e low erm, ke ɔsu sos wus na e sikpl owi ɛm.

Agŋ es jej

2 ¹Agŋ lisijimel, ɔny ek'ɔnyɔn ɔmn ɛy ɛs Kɔɔkɔ Jesu Krist anygbel ɛs ɛm a, kɔ jejr agŋ es. ²S'óc low nyam si bɛbmɔn: eke gbɛŋgbɛi nyam ok gbad mamn, elu sika kpatrowa, etŋ ow ɛy ɔny e luku as ec'araŋn, etŋ gbɔru nyam yeji ɛw mob esn sos ow ɛy ɔny ec'araŋn, ³b'ow ɔny gbɛŋgbɛi a ec'elum ligbɛl etŋ b'ow ɔny in li sig es any esɛl ec'usu a. Etŋ sica b'ow dadr gbɔru a esre: «I, inym es afr, oglog sig es wus.» ⁴Eke ow el ɛbɛn, ke ow elm agŋ am jejr es ab ee? Ow elm ów tutr eŋuŋ ana ee?

⁵Iŋŋn lɔru es, erur ɛm ec'agŋ lisijimel: Nyam ɔsum wus na ec'ɔgbɔru a ot yec'etŋ ke -l'el ɔmn ɛm ec'egbɛŋgbɛi, ke -l'ij **gbɛŋgbɛi** usu a eke l'ɛwar agŋ ek'erur ir a ec'aja. ⁶Bla sostiɛm, bi kokr gbɔru sos keskes ee? Kɔ ow elm egbɛŋgbɛi anake b'ijr ɔny gbɛ ke b'ot im ɔny jej ok usu ab ee? ⁷Kɔ ow elm el anake -li b'ifn nin mamn na ek'ijr ab ee?

⁸Kin Nyam Lel ec'odad eke am dad: *B'ow erur eŋŋ kaka fɛŋ esɛ ŋ obi af.*[†] Na, Nyam e gbɛŋgbɛi usu a ec'ol gbɛl ana. Eke b'elumn ol na a, ke ek'ow akpl a. ⁹Eke ɔny ec'ow kok ɛm bi jejr agŋ es, ke sikpl anake am kokr a, etŋ ol b'ow ɔb ɔny low. ¹⁰Eke eɣŋ b'ɔsu ol a, etŋ l'ɔb nyam es a, ke l'ɔb ol a fɛŋ es ŋ. ¹¹Etŋ eɣŋ a eke dad nine: *k'ijm nfaci a*, in cɛ li dad eke: *k'íbim eɣŋ.*[†] Na sostiɛm a, eke ijm nfaci etŋ ibi eɣŋ a, ke eluam ol a ana. ¹²Dàdr ke kókr ów amamn esɛ agŋ eke el yeji wel b'ow jej el ec'ow ok ol eke b'ɔny eɣŋ el lewi[†] ec'ab af. ¹³Eɣŋ eke ɔnym ɔɔŋŋ ikŋ a, in yeji Nyam k'ow ikŋm'n ɔɔŋŋ aŋke ɔɔŋŋ ikŋ akpl akm jej ok.[†]

[†] 1.25 *ol sɔbɔ a eke b'ɔny eɣŋ el lewi a*: ke Nyam ec'odad a nimum ana. Etŋ ek'eŋŋ b'elum Nyam ec'odad a, ke n'anm sikpl kok owi ɛm ij. [†] 2.8 Ob Ap 19.18. [†] 2.11 ɔkm Ok

20.13-14; Ol ɔkn 5.17-18. [†] 2.12 Bɛbmɔn 1.25 ab ab. [†] 2.13 *ɔɔŋŋ ikŋ akpl akm jej ok*: Èkan Matie 5.7.

Omni lele juma kok ab

¹⁴Lisijimel, eke egɛ bi dad esɛ: «M'ɔny ɔmn», etɛ n'am kokm ow e low a, ke ɔmn na b'ow eb elu'l es ee? ¹⁵Etɛ eke egɛ lisijim oglog lisijɔw nyam ɔnym ob sos ew lele ob ij ab, ¹⁶etɛ ɔny em ec'egɛ nyam dad el nine: «Imn erm es ey em, ɔgbur al, lok iy ɔny!», eke ɔmn el yec'eke akpl sos megl ec'a, ke na bla ow b'ow eel el ee? ¹⁷Eben nenymbri nyam, ɔmn yeji, eke l'elum in e low kok ɔkm a, ke l'uw ŋ.

¹⁸Kin ow eke wɛl ɔtu eke ki dad egɛ na! «Ŋ ɔny ɔmn kɔ em, wɛl b'ekn em e juma kok a. Yɛgm im ŋ ec'ɔmn a eke juma kok anm em a; etɛ em, m'ow mi yegm'ŋ em ec'ɔmn a juma kok em. ¹⁹Ŋ yeji ub nawrɛ eke Nyam nyam coco anɔ. Ow akpl! **Abɛ** enɔ yeji b'ub'r nawrɛ etɛ erɛn b'ɔny el -l'ufɛ.»

²⁰Nyamb egɛ, kɔ uwm any eke ɔmn eke juma kok anm em a el ɔfr ɔfr ee? ²¹Kɔ Nyam ocm ey lagɛ Abraham egɛ nyim nyim in e juma kok em, eke l'oc in ec'iy Isak n'im eke li ki kok egb waw ab ee?† ²²Ekn eke ɔmn lele juma ab b'okr af juma kok em, anke Abraham, in e juma kok a anake ɔɛ in ec'ɔmn a el ɔmn tasi a. ²³Eben Nyam Lel ec'odad eke dad a iy neny: *Abraham ɔny ɔmn Nyam em, ow ɔɛ Nyam oc'r esɛ egɛ nyim nyim af, etɛ esɛ'n Nyam e lawl.*† ²⁴Sica ekan eke Nyam b'oc egɛ egɛ nyim nyim in e juma kok em, kɔ ow elm ɔmn ɔny coco eke n'ɔny a sosisem.

²⁵Eben ow ecr Rahab facyɔw a ec'a yeji. Nyam oc'r egɛ nyim nyim, legɛ eke l'eb Ebre eyɛ a eke wɛl erm ow es lɔl em eke k'ekn eb a,† ke l'elum wɛl abu wɛl eb ejaɛb ejeci im a. Low na el juma ek'in ec'ɔmn a ɔɛ'n li kok. ²⁶Tasi em a, esɛ elɛl eke sos megl eke sel anm em a el ob ek'uw ab af a, eben nenymbri nyam, ɔmn yeji, eke juma kok anm em a, l'el ob ek'uw.

Neny lele anm ab

3 ¹Em lisijimel, k'erurir ek'agɛ ɔmn ɔny em k'el low yegm esɛl. Uwr any eke ey low yegm esɛl, wɛl b'ow jej ey ec'ow ok tuɔtuɔ akm agɛ fɛɛ ec'a. ²Ey, ow ɔmn em a si b'irm. Ek'egɛ iram in ec'odad ebl em, ke l'el egɛ tasi ek'ɔtu eke k'osu in e sos. ³Si b'oc lowili s'ucu meb s'elu gbanɔ nenym eke li k'elum ey; etɛ lowili ab em ce, si bi nyimn gbanɔ a nimum. ⁴Etɛ mijetɛ ek'agb ɔmn yeji, lɛf e lɛc a b'ɔny didmn es; nyimn ob likekli a ce eke nyimn es a b'ɔny es a, anake b'oc im'n yogɛ eke l'erur a. ⁵Neny yeji eben. Anm el sos megl ec'ob likekli nyam eke bi dad ow egbel.

Al mbɛbl yeji b'etɛl akp ligbel. ⁶Anm anɛ esɛ al af. Anm ek'anɛ ey e sos megl em a, el low ŋɛɛ kok fɛɛ ec'ob eke bi ŋɛɛ egɛ ec'owr anɛ ec'ow fɛɛ. Etɛ low ŋɛɛ fɛɛ eke wɛl bi dad a b'anɛ **gbre** ij usu ow. ⁷Egɛ ɔtu eke ki yegm mindey fɛɛ low elum'n: ɔr o, mindey eke b'eri es lok lok

† 2.21 Èkn Nuɔ ɔb 22.9. † 2.23 Nuɔ ɔb 15.6. † 2.25 Èkn Josue 2:1-25.

o, lele ɔcn ab; eɣɣ ɔtu ek'akm el es. ⁸Kɔ eɣɣ kaka ɔtum eke k'akm anm es; l'el ob ɣɣ ek'eɣɣ k'ɔtum ɔnym es inyam es tiɣ sɛɣɣ fɛɣ, l'el sekp ɣɣ eke b'ibi eɣɣ. ⁹Si b'oc anm em s'elu ey Es Kɔɔkɔ Nyam, ey Es bia. Etɣ anm ab em ce, si b'ofn aɣɣ eke Nyam kok ot'r es a. ¹⁰Low mamn eci sodad lele ofn ab b'anɣ neny nyam ab em ce ok ɔkm. Lisijimel, ow k'él eben! ¹¹Mij nuɣ kaka anm eke in em mij mamn lele mij ɣɣ ab b'anɣ am ok ɔkm. ¹²Kɔ likɣ nyam ɔtu eke k'ɔsu likɣ ejeci ec'ey ee? Kɔ okij em eɣɣ b'eɣɣ mij mamn eɣɣ ee?

Sɛwr eke b'anɣ Nyam ogɣ ow

¹³Kɔ ɔny em a eɣɣ nyam anɣ ek'el sɛwru, nuɣ em ɔny es ee? Ke l'élú in ec'es an mamn a ɔkm, sɛwr lele frɔɔ el ab ec'ów kok em. ¹⁴Kɔ ek'ɔny ec'erm em nyamnɛyr ɣɣ lele ɣkre ec'abɣ ab anɣ a, k'èwr sos eke ɔnyn sɛwr, k'ɔnyn low nawre k'itɣnin. ¹⁵Sɛwr akpasu na ánm afr Nyam ogɣ ówm; ow el wus na eci, ek'el aɣɣ em eci, ke el aɣɣ eci. ¹⁶Tasi em a, yogɣ eke nyamnɛyr lele ɣkre ec'abɣ ab anɣ a, neny af okr ánm, etɣ ów eɣɣ fɛɣ b'anɣ yogɣ. ¹⁷Afr eci sɛwr a el sɛwr mamn eke b'is erm es ey, ɔnym low lec em, ke b'ɔny aɣɣ okr af erm es ey em. N'ɔny aɣɣ e ɔɔɣ ikɣ etɣ li b'elu low kok mamn ɔkm. In l'elm enyembri yony yony es, n'ánm ogog nyam. ¹⁸Aɣɣ eke bi kok low fɛɣ erm es ey em a, b'ewl erm es ey el em, etɣ ow ec'ey eke wel b'ow a el es an mamn.

Òcr ɣ sosi ɔɣ Nyam ke ákm aɣɣ es

4 ¹Bogɣ ów esu lele mum ogɣ ab b'anɣ ow ɔny em ee? Kɔ ow elm ɔny ec'erm em eci sow tutr eɣɣ ec'erur em ow b'anɣ ow ee? ²B'ɛwr ob ek'elm ɔny ec'a nyamn af etɣ éɣnm; ob ek'elm ɔny ec'a b'aw ɔny, etɣ ɔtumɣ eɣnm, ow b'ɔɣ ɔny eel aɣɣ ibiu. B'ɛsur ów ogɣɣ mum, etɣ yec'ek'am ɛwr nyamn a, k'ow eɣnm, aɣke íbramn Nyam. ³Etɣ eke b'ibrmn yeji éɣnm aɣke úwmn ibrm. ɔny e tutr a b'el tutr ɣɣ; yec'eke b'ibrmn a, ɔny e lís ec'erur e kok eci. ⁴Enyembri yony yony esel, † kɔ uwmn any eke, eke eel wus na e lawl, ke eel Nyam ec'efnu ee? Eɣɣ eke b'erur eke k'el wus na e lawl a, el Nyam ec'ifnu. ⁵Ki tutar eke ow el ɔfr ɔfr ce Nyam Lel am dad eke Nyam b'ogɣ uwern abɣ a eke l'elu ey em a eci. ⁶Eben yeji emeny Nyam elu in ec'erm mamn ɔkm etɣ n'ɔɣ ey abusu ek'agb akm low fɛɣ, aɣke Nyam Lel dad ninɛ: *Nyam b'ɔɔr aɣɣ eke b'ɛw sos a abr, etɣ li b'elu in ec'erm mamn ɔkm aɣɣ eke b'is es a e lís.* †

⁷Ca gbe òcar ɔny sosi ɔɣɣ Nyam, òɣɣ **agn** ar; etɣ li b'ow l'uru l'egb ɔny es. ⁸Èrir owr titmn Nyam, etɣ li b'ow l'eri l'ow li titm ɔny. Sikpl esel, ɣɔɣɣr sabu

† 4.4 *Enyembri yony yony esel* odad na Grék em a: *afacu*; ow el eɣɣ ek'íɣɣ Nyam ɔny coco nuɣ, ke b'igɣ ob ejeci ek'elm Nyam yej'a nuɣ; Matie 6:24. † 4.6 Nyandre 3.34; 1 Pier 5.5.

ngbrohñ sikpl em; ony eke bi cæcmn any a, àyalil ony e merm a! ⁹Low dúdu ony, ìkññ ony, ànññ sòññ em; ke ony e miyer ifi ítññ el òññ ikñ, ke ony e sos em ìññ él sos es òw. ¹⁰Ìsr es Es Kòtòkò ec'any af, etñ li b'ow n'ony l'ìgbl ony ogh.

Kí jejm egh kaka feñ e low okm

¹¹Agñ lisijimel, kì dadr ów eññ k'okarir af; egh eke bi dad low ñññ ok lisijim af, oglog b'òb'r low kpeññ a, bi dad ol ec'ów eññ, etñ b'òb ol low. Ek'am jej ol e low ok ke elm egh eke b'elum ol, kò in e jej ok es anake am el a. ¹²Nyam sony ce eke b'òñ ol a, in ce l'el Jej Ok Es; in sony coco l'òtu eke li k'eb l'elu es ke l'íbi yeji. Ìñ eke am dad egh kaka feñ e low ñññ a, ayaf b'ocr ñ sosti ee?

K'èw sos

¹³Sica èwr erm, ony eke bi dadr esre: «Yefenyana, ow k'òdm efi, si b'ow s'im eb na em s'ij lakpo nyam, s'ól an s'èññ os.» ¹⁴Uwmn ony ec'efi ec'owr anñ a ec'eel eke b'ow ecr ab any! Ony anññ ese jru eke b'ey, ke kpeññ b'oc es ab af. ¹⁵Kin eel eke òtur eke ki dadr a: «Eke Es Kòtòkò egh etñ s'anñ owr a, si b'ow si kok ów a eke s'am aw s'eb a.» ¹⁶Ow eke ki kokr a anñ, etñ am ewr sos, òbr nenym. Sos ew akpasu na akplm. ¹⁷Na sostiem a, ek'egñ uw low mamn any eke ki kok etñ li kokm a, li kok sikpl.

Egbreññbi ec'ewar

5 ¹Sica egbreññbi, ìñññ loru es. Low dúdu ony, ìkññ ony gbre a eke b'ow owr ony a sostiem! ²Ony ec'òb ony a ugñ es, etñ sisñ ij ony ec'òb sos ew a. ³Ony e sika lele ony e jete ab ab ok adagra; adagra ikñ na b'ow ij ony e danju etñ b'ow ñññ ony e sos megl a ese al af. Kò uwmn any eke segñ uwr, etñ am asr ony ec'òb ony luku ee? ⁴Eghm eke ki sògr ony e sògm juma kok esel a labm. Ìñññ loru es irir dedeku eke -n'am ony ony a: juma esel eke b'ub ony ec'egb a eci ony ikñ a, Es Kòtòkò ek'el afr lele wus ab ec'ar es ligbel a iri. ⁵Anññ wus na ìjr eb, kokr ów ek'erurir. Etñ ese mindey af ìjr mob agbr, iir sinon ony e luw e legñ eci. ⁶Agñ eke kokm low ñññ kaka a, òbr el low, -li dogñnm sos etñ ibir el.

Gbre ij em eci low eku

⁷Na sostiem agñ lisijimel, ùsurir erm tonj bake Es Kòtòkò ów. Ese lele eke egb ewl es b'eku tonj nyam krèkrè lele es abal el ab b'an, yec'etñ ke l'úb egbey amamn a, ony yeji èkur eben. ⁸Ony yeji ùsurir erm, ìnymn es kikri anke Es Kòtòkò eci mowrer a titm.

⁹Agñ lisijimel, k'èbal erm k'okarir af, yec'etñ ke Nyam kí jejm ony e low okm. Jej ok es a ow inym es lisany. ¹⁰Agñ lisijimel, òkan **kokoba** òb esel eke dad odad Es Kòtòkò e nin em a e gbre ek'ij erm susu em a, ke ony yeji kókr eben. ¹¹Si b'aw el eke Nyam edñ el òwrò, el ec'erm susu a sostiem. Irir

e lel eke Job ij gbre erm susu em, ke ow e nuη edη em a Es Kɔtɔkɔ Nyam edη'n ɔwrɔ a. Nawre, Es Kɔtɔkɔ Nyam ɔny agη e ɔrη ikη, etη li bi kok wel low mamn.

¹² Sica agη lisijimel, ów a feη e mi dad ɔny a e nyam ek'ɔny any el: ke ɔny eci "εε" éli "εε" ke ɔny eci "ηjaη" éli "ηjaη"; kɔ k'ɔcr afr lele wus ab e nin em, oglog akunda ejec'em k'ijal k'okr ɔny sosi af, yec'etη ke k'éymn Nyam e jej ok ab em.

Gbre ij em e Nyam ηɔη

¹³ Sica ek'ɔny em ec'egη nyam anη gbre em a, ni ηɔη Nyam. Etη ek'ɔny em ec'egη nyam anη sos em iηη em a, l'égη ej li kɔklm Nyam. ¹⁴ Ek'ɔny em ec'egη nyam anη ɔl em, l'éśη Nyamel em ec'agη ekpekp a, ke wel ηɔη Nyam ɔη'n, ók'r mun nuη Es Kɔtɔkɔ e nin em. ¹⁵ ɔmn em eci ηɔη ikη na b'ow eb ɔlu a elu es ewlm'n; Es Kɔtɔkɔ b'ow ɔny igbl'l ogη, etη eke li kok sikpl yeji, ow b'ow oc ap'r. ¹⁶ Ègηη ɔny e sikpl ebr ɔny ɔfr em, ke ηɔηan Nyam ɔηanin, yec'etη ke éwal. Neny nyam es e ηɔη mamn a b'ɔny lec ɔɔɔ. ¹⁷ Kokoba ɔb es **Eli** yeji, egη ese ey af. Ni ηɔη Nyam tuɔtuɔ in ec'erm feη em eke nyam k'ánm, etη wus ab af nyam anm toη ow ij akpo nyahan lele likpr ab. ¹⁸ Etη emeny ni ηɔη Nyam, etη nyam an ɔη egb ɔsu. ¹⁹ Agη lisijimel, ek'ɔny em ec'egη nyam irm low nawre ec'ejagb af, etη ɔny em ec'egη nyam oc ow'r a, ²⁰ ɔkan low na: egη eke b'ow ɔny sikpl es nyam oc es ejagb ηηη af a, b'ow eb sikpl es a ec'abη a elu es luw em; etη sikpl ɔɔɔ a eke egη a kok a b'ow ɔny oc ap.